

第二八〇册

明倫彙編

官常典

宗人府部

吏部部

戶部部

(卷)

二五—二六

二七—二八

二九

古今圖書集成

中華書局影印

古今圖書集成
目錄

卷一百一十五

古今圖書集成

中華書局影印

欽定古今圖書集成明倫彙編官常典

第二百九十二卷目錄

宗人府部名臣列傳三

遼

耶律敵祿

耶律信先

耶律特麼

耶律阿息保

宋一

趙德彝

趙安仁

趙允弼

趙克己

趙師民

趙宗景

趙子松

趙子砥

趙子滿

趙士嶠

趙不羣

趙不怠

趙叔近

趙善譽

趙希懌

耶律蒲古

耶律良

耶律仙童

趙孚

趙良規

趙克繼

趙叔韶

趙君錫

趙子洵

趙子樸

趙子畫

趙士晤

趙士晴

趙不尤

趙善俊

趙叔向

趙希言

官常典第二百九十二卷

宗人府部名臣列傳三

遼

耶律敵祿

按遼史本傳敵祿字陽隱孟父楚國王之後性質直多膂力察割作亂敵祿聞之入見壽安王慷慨言曰願得精兵數百破賊黨王嘉其忠穆宗即位為北院宣徽使上以飛狐道狹詔敵祿廣之明年將兵援河東至太原與漢王會于高平擊周軍敗之仍降其衆忻代二州叛將兵討之會耶律撻烈至敗周師於忻口師還卒

耶律蒲古

按遼史本傳蒲古字提隱太祖弟蘇之四世孫以武勇稱統和初為涿州刺史從伐高麗有功開泰末為上京內客省副使太平二年城鴨綠江蒲古守之在鎮有治績五年改廣德軍節度使尋遷東京統軍使莅政嚴肅諸部懾服九年大延琳叛以書結保州夏行美執其人送蒲古蒲古入據保州延琳氣沮以功拜惕隱十一年為子鐵驪所殺

耶律信先

按遼史本傳信先與宗以其父魂引為刺血友幼養於宮善騎射重熙十四年為左護衛太保同知殿前點檢司事十八年兼右祇候郎居班詳穩上問所欲信先曰先臣魂引與陛下分如同氣然不及王封倘使蒙恩地下臣願畢矣上曰此朕遺忘之過追封燕王是年從蕭惠伐夏敗於河南側被責清寧初為南面林牙卒

耶律良

按遼史本傳良字習撚小字蘇著帳郎君之後生於乾州讀書醫巫間山學既博將入南山肄業友人止之曰爾無僕御驅馳千里縱聞見過人年亦垂暮今若即仕已有餘地良曰窮通命也非爾所知不聽置數年而歸重熙中補寢殿小底尋為燕趙國王近侍以家貧詔乘廐馬遷修起居注會獵秋山良進秋游賦上嘉之清寧中上幸鴨子河作捕魚賦由是寵遇稍隆還知制誥兼知部署司事奏請編御製詩文目曰清寧集上命良詩為慶會集親製其序頃之為敦睦官使兼權知皇太后宮諸局事良聞重元與子涅魯古謀亂以帝篤於親愛不敢違奏密言於皇太后太后託疾召帝白其事帝謂良曰汝欲間我骨肉邪良奏曰臣若妄言甘伏斧鑕陛下不早備恐墮賊計如召涅魯古不來可卜其事帝從其言使者及門涅魯古意欲害之羈於帳下使者以佩刀斷帝而出馳至行宮以狀聞帝始信亂平以功遷漢人行宮都部署咸雍初同知南院樞密使事為惕隱出知中京留守事未幾卒帝嗟悼遣重臣賜祭給葬具追封遼西郡王諡曰忠成

耶律特麼

按遼史本傳特麼季父房之後重熙間為北剋累遷六部亮里太尉大安四年為倒撻嶺節度使頃之為禁軍都監是冬討磨古斯斬首二千餘級十年復討之既捷授南院宣徽使壽隆元年為北院大王四年知黃龍府事薨

耶律仙童

按遼史本傳仙童仲父房之後重熙初爲宿直官累遷楊隱都監以寬厚稱蒲奴里叛仙童爲五國節度使率師討之擒其帥陶得里又擊烏隗叛降其衆改彰國軍節度使拜北院大王清寧二年知黃龍府事遷侍衛親軍馬步軍都指揮歷忠順武定二軍節度使致仕封蔣國公咸雍初徙封許國卒

耶律阿息保

按遼史本傳阿息保字特里典五院部人祖胡劣太子時徙居西北部世爲招討司吏阿息保慷慨有大志年十六以才幹補內史天慶初轉樞密院侍御金人起兵城境上遣阿息保問之金人曰若歸阿疎敢不聽命阿息保具以聞金兵陷寧江州邊兵屢敗遣阿息保與耶律章奴等齋書而東冀以苟降阿息保曰臣前使依詔開諭略無所屈將還謂臣曰若所請不遂無相見今臣請獨往不聽將行別蕭得里底曰不肖適異國必無生還賴公善輔國家既至阿息保見執入乃道歸及天祚敗績還都巡捕使六年從阿疎討耶律章奴加領軍衛大將軍阿疎將兵而東阿息保送至軍乃還天祚怒其專輒之三百尋爲奚六部禿里太尉後阿疎反阿息保以偏師進擊臨陣墜馬被擒因阿疎有舊得免時阿疎頗好殺阿息保謂曰欲舉大事何以殺爲由是全活者衆會阿疎敗乃還以戰失利囚中京數歲保大二年金兵至中京始出獄尋爲敵烈皮室詳穩是時魏王淳僭號屢遣人以書來招阿息保封書以獻因陳曰東兵銳未可輕敵及石叢鐸之敗天祚奔竄名阿息保不時至疑有二心并怒爲淳所招殺之初阿息保知國將亡前

後諫甚切及死以非罪人尤惜之

宋一

趙德彝

按宋史魏悼王廷美傳魏王子德彝字可久太祖召鞠於宮中德隆卒授右千牛衛大將軍封長寧郡侯代兄德隆判沂州時年十九飛蝗入境吏民請坎壘火焚之德彝曰上天降災守臣之罪也乃責躬引咎齋戒致禱既而蝗自殫儒生乙恕者郊居肄業一日有尸橫舍下所司捕恕抵獄將寘於法德彝疑其冤命他司按之無異因令緩刑以俟未幾果獲殺人者恕遂得釋進封郡公淳化四年爲右監門衛大將軍遷左武衛大將軍改封廣平郡民詣闕乞畱有詔嘉獎真宗初召還咸平二年命判滁州與德恭並畱不遣三年授徐州刺史累遷保信軍節度觀察畱後大中祥符八年卒年四十九上臨奠廢朝三日贈昭信軍節度使追封信都郡王諡安簡

趙孚

按宋史趙安仁傳安仁字樂道河南洛陽人曾祖武唐號州刺史父孚字大信周顯德初舉進士調補開封尉乾德中爲浦江令持父喪服闋攝未寧令會親征太原部送本邑糧饋民懷其惠列狀以聞即眞授其任擢宗正丞開寶中初置衣庫令孚主之俄坐事連逮抵罪語見趙普傳太宗即位起爲國子監丞知袁州還知開封府司錄參軍事受詔與殿中侍御史柴成務供奉官葛彥恭殿直郭載行視黃河分南北岸按行復遙隄以紓湍決孚言治遙隄不如分水勢於是建議於澶滑二州立分水之制時決河未平重

惜民力而寢焉朝廷議行封禪孚上封禪頌名拜秘書丞賜緋魚受詔鞠開封獄得其非辜者即日授推官遷監察御史出知舒州改殿中侍御史雍熙中詔詢文武禦戎之策孚奏議曰臣愚以爲不可干戈不勞飛輓爲萬世之利者敢獻其說惟明主擇之古者兵交使在其間雖飛矢在上走驛在下蓋信義不可廢也昔苗民逆命帝乃誕敷文德而有苗格又仲尼曰有能一日克己復禮天下歸仁只如井門一方歷代難取聖襟英斷一舉成功當其逆城危於累卵生聚懷伏而陛下猶遣通事舍人薛文寶入城諭之曰者北邊來賓全燕猶梗再興軍旅將復土疆臣竊計屯戍邊陲故非獲已暴露原野豈是願爲欲望朝廷通達國信近鑒唐高祖之降禮達遠法周公之讓地聖人以百姓之心爲心君子見幾而作論以禍福示以恩威議定邊疆未息征戰養民事天濟時利物莫過於此臣又計彼雖嗜好不同然去危就安厭勞喜逸亦人情之所同也上嘉之雍熙中廷策貢士而安仁預爲考會賜金紫因顧安仁問孚年幾安仁曰臣父年六十二上曰孚名士也亟召對亦賜金紫明年卒

趙安仁

按宋史本傳安仁字樂道河南洛陽人生而穎悟幼時執筆能大字十三通經傳大旨早以文藝稱趙普沈倫李昉石熙載咸推獎之雍熙二年登進士第補梓州推鹽院判官以親老弗果往會國子監判五經正義板本以安仁善楷隸遂奏畱書之歷大理評事光祿寺丞召試翰林以著作佐郎直集賢院賜緋時

王侯內戚家多以銘誄爲托太宗製九絃琴五絃阮時多獻賦頌上嘉文物之盛悉閱覽訂其工拙時稱安仁李諤楊億辭雅贈名詣中書獎諭翌日改還太常丞真宗即位拜右正言預重修太祖實錄上出師大名安仁上疏曰臣以爲有急務者三大要者五急務三者其一激勵戎臣舉勸懲之典其二振救邊民行優恤之惠其三車駕還京重神武之威大要五者其一選將略其二持兵勢其三求軍謀其四修軍政其五愛民力咸平三年同知貢舉未幾知制誥副夏侯嶠巡撫江南還知審刑院嘗有將校笞所部卒死罪議大辟安仁以軍中之令非嚴不整遂獲免死繼判尚書刑部兼制置羣牧使同知三班審官院景德初翰林學士梁顥召對詢及當世臺閣人物上稱安仁文行尋顯卒即以安仁爲工部員外郎充翰林學士初乎極陳和好之利至是安仁從幸澶州會北邊請盟首命安仁撰答書又獨記太祖時聘問書式遂使韓杞至首命接伴凡觀見儀制多所裁定館舍夕飲杞舉橙子曰此果嘗見高麗貢安仁曰橘橙產吳楚朝廷職方掌天下圖經凡他國所產靡不知也今給事中呂祐之嘗使高麗未聞有橙柚杞失於誇誕有愧焉杞既受襲衣之賜且以長爲解將辭復左袞安仁曰君將升殿受還書天顏咫尺如不衣所賜之衣可乎杞乃服以入及姚柬之至又令安仁接伴東之談次頗矜兵強戰勝安仁曰老氏云佳兵者不祥之器聖人不得已而用之勝而不美而美之者是樂殺人也樂殺人者不得志於天下東之自是不敢復言王繼忠將兵陷沒不能死節而反事之東之屢稱

其材安仁曰繼忠早事藩邸聞其稍謹不知其他其敏於酬對切中事機類如此時論翕然稱其得體上益器之自是有意柄用安仁又集和好以來事宜及采古事作載斗懷柔錄三卷以獻二年春又與晁迥等同知貢舉三年以右諫議大夫參知政事俄修國史大中祥符初議封禪與王欽若並爲泰山經度制置使判兗州禮畢復拜工部侍郎內外書詔有切要者必經其裁進秩刑部五年以兵部侍郎仍兼修史奉祀又同知禮儀院八年知貢舉三典春閣擇士平允是故獨無譏諍上再賜詩嘉之尋知兼宗正卿舊制官閣令凡有議奏與寺連署上以安仁舊德俾知寺以次列狀取裁寺掌玉牒屬籍梁周翰始創其制而未備安仁重加詳定又爲仙源積慶圖皆統例精簡奏置修玉牒官事具職官志國史成遷右丞是夏又爲景靈宮副使屢得對言事嘗奏曰方今治定功成固軼前代陛下尚親庶政肝食忘倦然而君臨之大所宜分飭有司爲式於天下遂詔諸司掌務有條例者母或奏稟天禧二年改御史中丞請給御寶印歷書三院御史彈糾事五月暴疾卒年六十一廢朝贈吏部尚書諡文定以其子溫瑜爲大理寺丞良規爲奉禮郎承裕爲正字安仁質直純懇無所矯飾寬恕謙退與物無競雖家人僕使未嘗見其喜愠女弟適董氏早寡取歸給養其甥董重運尚幼躬自訓導爲畢婚娶幼少與宋元與同學元與門地貴盛待安仁甚厚元與蚤卒家緒浸替安仁屢以金帛濟之善訓諸子各授一經尤嗜讀書所得祿賜多以購書雖至顯寵簡儉若平素時閱典籍手自讎校三館舊

闕虞世南北堂書鈔惟安仁家有本真宗命內侍取之嘉其好古手詔褒美尤知典故凡近世典章人物之盛悉能記之喜誨誘後進成其聲名當世推重之有集五十卷溫瑜後爲國子博士

趙良規

按宋史趙安仁傳良規字元甫父安仁奏爲祕書省正字同判太常寺張知白薦之召試賜進士及第用王曙舉擢集賢校理兼宗正丞預修會要坐宗正吏盜太廟神御物出通判蘄州徙河南府知泰滁二州歷京西陝西路提點刑獄荆湖南路轉運使奏罷馬氏時所賦丁口米數萬石權判三司開拆司度支勾院直集賢院知廬州積官至光祿卿罷職初與張憲掌禹錫齊郭張子思並爲太常少卿兼館職當進諫議大夫而執政斬之止遷卿故事卿不兼職故皆罷未幾皆還之改直祕閣同判宗正事遷祕書監知同陝相三州陝歲餼百姓請闕殘稅二分爲官伐芟以給河壩或以爲須報乃可行良規曰若爾無及矣檄縣遂行而以擅命自劾進太子賓客權判殿中省還尚書工部侍郎判本部知濠州卒良規所至州郡爲政不甚力然善委任佐屬祿賜多分贈族人餘皆輸之酒家子君錫

趙允弼

按宋史鎮王元偓傳元偓子允弼八歲召入禁中令皇子致拜允弼不敢當御樓觀誦得與皇子並坐皇子卽位是爲仁宗允弼累遷武寧軍節度使兼侍中判大宗正事封北海郡王英宗時拜中書令徙王東平神宗卽位拜太保鳳翔雄武軍節度使朝期望熙

寧二年丁母憂悲痛不勝喪固辭起復母葬有日而允弼病篤願諸子以不得終大事為恨薨帝臨哭之慟輟朝三日贈太師尚書令兼中書令追封相王諡孝定允弼性端重時然後言諸官增學官員允弼已貴猶日至講席延伴讀官讀孟子一節領宗正三十年與濮安懿王共事相友愛為宗屬推敬

趙克繼

按宋史魏王廷美傳魏王子德恭德恭子承慶承慶子克繼善楷書尤工篆隸宗正薦之仁宗親臨試及令臨蔡邕古文法寫論語詩書復詔與士朝分隸石經帝曰李陽冰唐室之秀今克繼朕之陽冰也訓子弟力學一門登儒科者十有二人嘗進所集廣韻字源帝稱善藏之祕閣元祐五年以定武軍節度觀察留後卒贈開府儀同三司建國公諡章靖

趙克己

按宋史魏王廷美傳魏王子德恭德恭子承壽承壽子克己曉音律嘗作雅樂圖樂曲以獻侍宴大清樓進所學虞世南書賜器加等終右千牛衛大將軍贈深州防禦使饒陽侯

趙叔韶

按宋史魏悼王廷美傳魏王子承壽承壽子克己克己子叔韶字君和慶曆六年與諸宗子帝前臨真宗御書選第一皇祐初進所為文召試學士院中等賜進士及第自太子右監門率府副率遷右領軍衛將軍入謝命坐賜茶仁宗曰宗子好學者頗多獨爾以文章第進士前此蓋未有也朕欲天下知屬籍有賢者宜勿忘所學叔韶頓首謝既退又出九經賜之還

右屯衛大將軍至和中上書求試煩劇加領賀州刺史終和州防禦使贈鎮東節度觀察留後會稽郡公

趙師民

按宋史本傳師民字周翰青州臨淄人九歲能屬文舉進士第孫奭辟兗州說書領諸城主簿師民學問精博爽自以為不及夏竦尤所奇重稱為盛德君子論其文行願回兩子恩授以京秩除齊州推官青州教授天平軍節度推官年五十來京師近臣張觀朱郊王堯臣龐籍韓琦明鎬列薦為國子監直講兼潤冀二王官教授改著作佐郎宗正寺主簿加崇文院檢討崇正殿說書遷宗正丞會趙元昊反罷進講師民上書陳十五事一日咨輔相二日命將帥三日東侍從四日擇守宰五日治軍旅六日修邊防七日求諫諍八日延講誦九日革貢舉十日久官政十一日謹財用十二日不遺年十三日容諍諫十四日除忌諱十五日慎出令因獻勸講策明年春帝遂御迎陽門召近臣觀圖書復命講讀經史師民見朝廷厭兵屈意以招元昊內不能平乃上言請任方面以圖報効遷天章閣侍講同知貢舉進待制同判宗正寺嘗講詩如彼泉流曰水之初出喻王政之發順行則通通故清潔逆亂則壅壅故濁敗賢人用則王政通而世清平邪人進則王澤涇而世濁敗幽王失道用邪紂正正不勝邪邪雖有善人不能為治亦將相率而淪於汙濁也帝曰水何以喻政對曰水者順行而潤下利萬物故以喻政此於此與義最大後講論語問修文德曰文者經天緯地之總稱君人之道撫之以仁制之以義接之以禮諱之以信皆是帝曰然其所先

者無若信也曰信者天下之大本仁義禮樂皆必由此此實至道之要復問鑽燧改火曰古之聖王舉動必順天時所以四時變火隨木色近世漸務苟簡以為非治具而遂廢之至其萬事皆不如古又問子夏子張所言交道孰勝曰聖哲之道舍履廣大與天地參善者有以進德惡者俾之改行子張之言為優他日讀漢記問長安城衆莫能知共推師民因陳自古都雍年世舊址所在若畫諸華帝悅曰何其所記如此在經筵十餘年甚見器異嘗盛夏屬疾家居帝飛白書團扇為和平字賜以寄意累請補郡除龍圖閣直學士知耀州帝自寫詩寵行目以儒林舊德將行上疏曰近視太陽食於正朔此雖陰陽之事亦慮是天意欲以感動聖心臣非習史不知天道但率愚意言之其月在亥亥為水水為正陰其日在丙丙為正陽月掩日陰侵陽下蔽上之象也詩曰十月之交朔日辛卯又曰彼月而微此日而微謂以陰奸陽失其叙也又曰百川沸騰山冢萃崩高岸為谷深谷為陵謂下陵上侵其權也又曰皇父卿士番惟司徒家伯冢宰仲允膳夫契子內史厥維趣馬樞維師氏謂大小之臣有不得其人者也宗周之間時王失德今而引喻蓋事有所譬固當不諱凡天之示象由人君有失不然則下蔽其上古人君之失不過暴虐怠慢奢侈縱政不師古始捨是何失道之有今聖心慈仁恭勤儉約自檢動循典禮如此自非下蒙上邪撓正使主恩不下究而誰之咎歟望陛下朝夕咨于丞弼心膺之臣洎左右近侍耳目之官其忠而純者與之慎東內外百執事及州縣牧宰使主恩究于下不為羣

邪所蔽塞則億兆之幸也三遷刑部郎中復領宗正卒師民淳靜剛敏舉止凝重功喪父哀感不畜婢妾年四十四始婚志尚清遠專以讀書爲事性極慈恕勤於吏治政有惠愛嘗奏獨陝西旱租又欲論權酷諸弊會仁宗不豫而止嘗患近世官失其守作正官名議多不載有集三十卷子彥若試中書舍人

趙君錫

按宋史趙安仁傳安仁子良規良規子君錫字無愧性至孝母亡事父良規不違左右夜則寢於傍凡衾裯薄厚衣服寒溫藥石精粗飲食旨否櫛髮翦爪整冠結帶如內則所載者無不親之及登進士第以親故不願仕良規每出必扶掖上下至雜立僕御中嘗從謁文彥博彥博異其容止問而知之語諸子令視以爲法良規沒調知武強縣從韓琦大名幕府彥博及吳充在樞筦更薦之爲檢校吏房文字徙知大宗正丞加祕閣校理改宗正丞時增諸宗院講書教授官而逐院自備緡錢爲月餽貧者或不能以時致宗師輒移文督取君錫言國家養天下士於太學尚不較其費安有教育宗室令自行束修之理詔悉從官給歷開封府推官元祐初遷司勳右司郎中太常少卿擢給事中論蔡確章惇有罪不宜復職大河不可輕議東回請亟罷修河可以省邦費寬民力蘇軾出知杭州君錫言軾之文追攀六經蹈藉班馬知無不言壬人畏憚爲之消縮公論倚重隱如長城今飄然去國邪黨必謂朝廷稍厭直臣且將奉陪復進實係消長之機不若畱之在朝用其善言則天下蒙福聽其譴論則聖心開益行其詔令則四方風動爲利博

矣進刑部侍郎樞密都承旨拜御史中丞即上疏勸哲宗親講學廣諮問爲躬政之漸君錫素有志行後隨人低昂無大建明初稱蘇軾之賢遇賈易劾軾題詩怨謗即繼言軾負恩懷逆無禮先帝願亟正其罪宣仁后覽之不悅曰君錫全無執守復以吏部侍郎天章閣待制知鄆陳澧三州河南府徙應天因清明出郊具奠謁杜衍張昇張方平趙鼎王堯臣蔡抗蔡挺之坐邀七家子孫陪祭於側時人傳其風義紹聖中貶少府少監分司南京卒年七十七紹興六年贈徽猷閣直學士

趙宗景

按宋史鎮王元偁傳元偁子允弼允弼子宗景以相州觀察使同知大宗正事神宗以其父允弼司宗久故選用之宗景事母孝居喪如不能勝居第火冒急赴家廟不恤其他火亦不爲害元祐中累遷彰德軍節度開府儀同三司檢校司空封濟陰郡王宗景喪其夫人將以妾繼室先出之於外而託爲良家女且納焉坐奪開府既而還之紹聖四年薨年六十六贈太師循王諡曰思

趙子道

按宋史本傳子道字正之燕王五世孫父令鑠官至寶文閣待制子道以蔭補承務郎累遷少府監主簿改河南少尹時治西內子道有幹才漕使朱昇器之或事有未便子道輒力爭昇每改容謝之除蔡河撥發綱運官會夏旱河水涸轉餉後期貶秩一級提舉三門白波輦運事除直祿閣丁內艱起復累遷龍圖閣祕閣修撰除陝西轉運副使初蔡京鑄夾錫錢民

病壅滯子道請鑄小鐵錢以權之因範格以進徽宗大說御書宣和通寶四字爲錢文既成子道奏令民以舊銅錢入官易新鐵錢旬日易得百餘萬緡帝手札以新錢百萬緡付五路均糴細麥命子道領其事民苦限迫詣子道訴者日數百人子道奏請寬其期民便之會蔡京再相言者希京意諭子道亂錢法落職奉祠靖康初復祕閣修撰金人侵洛子道奔荆南潰兵祝靖盛德破荆南城子道匿民家靖等知之來謁言京城已破子道泣說之曰君輩宜亟還都城護社稷取功名無貪財擾州縣也皆應曰諾子道因草檄趣之翌日靖等遂北行紹興元年召見復徵飲閣直學士知西外宗正司改江西都轉運使特建督府軍須浩繁子道運餉不絕以功進寶文閣直學士再知西外宗正司三京新復除京畿都轉運使以疾辭卒於家年六十七子道幼警悟蘇軾過其家抱置膝上謂其父曰此公家千里駒也及長善談論工詩然崇寧大觀間土木繁興子道每董其役識者鄙之

趙子崧

按宋史本傳子崧字伯山燕懿王後五世孫登崇寧五年進士第宣和間官至宗正少卿除徽猷閣直學士知淮寧府汴京失守起兵動王道阻未得進聞張邦昌僭位以書白康王宜遣師遣金人河上迎請兩宮問罪僭逆若議渡江恐誤大計遂與知穎昌府何志同等盟傳檄中外已而聞金人退引兵襄邑遣范瑁徐文中詣濟王請王進兵南京且言國家之制無親王在外者主上特付大王以元帥之權此殆天意亟宜承制號召四方豪傑則中原可傳檄而定王命

子崧充大元帥府參議官東南道都總管邦昌家在廬州于崧檄通守趙令儀殘察之且請捕誅其母子以絕姦心又言自圍城以來朝命隔絕乞下諸路凡有事宜並取大元帥府裁決偽檄毋輒行宣撫使范訥逗撓營私所宜加罪宜獨被兵州縣租經理淮南荆浙形勢之地毋為羣盜所據檄止諸路毋受邦昌偽赦移書責邦昌曰人臣當見危致命今議者藉藉謂劫請傾危之計實由閣下不然金人何堅拒孫傳之請而卒歸於閣下也敵既遠去宜速反正若少遲疑則天下共誅逆節雖悔無及矣又遣書王時雍曰諸公相與亡人之國方且以為佐命功臣不知平日所學何事會邦昌遣使迎王次第白于崧于崧即貽王書曰似聞謂以京師殘破不可復入止欲即位軍中便圖遷徙臣竊惑焉夫欲致中興當謹舉措宜先謁宗廟觀母后明正誅賞降霽四方若京師果不可都然後徐議所向遂傳檄京師奏於隆祐太后曰諸路先聞二聖北遷易姓改國恐間有假討逆之名以竊據州郡者乞速下明詔諭四方以迎立康王之意庶幾人心慰安好究自消矣尋以所部兵會濟州康王即位子崧請放諸路常平積欠錢又言臺諫為人主耳目近年用非其人率取旨言事請遵舊制聽學士中丞互舉范祖禹常安民上官均先朝言事盡忠請錄其子弟皆可其奏因建三屯之議一屯潼關一屯河中陝華一屯青鄆間以張聲勢萬一敵騎南侵則三道並進可成大功除延康殿學士知鎮江府兩浙路兵馬鈐轄上章論王時雍徐秉哲吳玠莫儔范瑒胡思王紹王及之顏博文余大均等逼遷上皇取

太子尊六官捕宗室竊禁物都人指為國賊伏望肆諸市朝以為臣子之戒時滑州兩經殘破子崧薦傳亮可任除亮滑州通判黃潛善沮之命遂寢賊趙萬犯鎮江子崧遣將擊萬于丹徒調鄉兵乘城為備頃之官軍敗歸鄉兵驚潰子崧率親兵保焦山寺賊據鎮江初昌陵復土司天監苗昌裔謂人曰太祖後當再有天下子崧習聞其說靖康末起兵檄文頗涉不遜子崧與御營統制辛道宗有隙道宗求得其文上之詔御史往案其獄情得帝震怒不欲暴其罪坐以前擅棄城降單州團練副使謫居南雄州紹興二年赦復集英殿修撰而子崧已卒於貶所

趙子樸

按宋史本傳子樸燕懿王後五世孫登元祐六年進士第靖康中為汝州太守金人再淪盟破荆湖諸州獨子樸能保境土李綱言於朝遷寶文閣直學士尋提舉萬壽觀紹興七年卒

趙子砥

按宋史本傳子砥藝祖後令珣之子也仕至鴻臚丞北遷至燕山久之欲遁歸乃遣其徒朱國寶王孝安至中京求得皇上宸翰懷之以歸建炎二年六月至行在帝命輔臣召問于都堂子砥言金人講和以用兵我國斂兵以待和往者契丹主和議女真主用兵十餘年間竟滅契丹今復蹈其轍轍人畏虎噬虎以肉食盡終必食人若設陷筭待之庶能制虎因復故官已而賜對稱旨命知台州卒

趙子畫

按宋史本傳子畫字叔問燕王五世孫少警敏強記

工書翰累官惠州通判宣和初充詳定九域圖志編修官出知澤州改密州詔為刑部員外郎以憂去建炎四年遷吏部員外郎尋用大宗正士儀薦遷尚書左司員外郎兼權貨務歲收茶鹽香錢六百九萬餘緡以功進秩一階試太常少卿集太常因革禮八十篇為二十七卷上言復春分祀高禘禮除權禮部侍郎遷徽猷待制樞密都承旨以公族為侍從又改官制後都承旨用文臣皆自子畫始衛嚴信饒之民生子多不舉子畫請禁絕之累求補外遷徽猷閣直學士知秀州既而奉祠以歸寓于衢紹興十二年卒年五十四

趙子瀟

按宋史本傳子瀟字清卿秦康惠王後孝靖公令輿之子也七歲而孤家貧力學登宣和中進士第調真州刑曹掾與守爭獄事解官去改衢州推官胡唐老奇其才任之屬時多故子瀟佐唐老繕完城具苗劉兵至城下不能攻以功進一秩累官吏部郎中求補外遷戶部郎中總領江淮軍馬錢糧諸司饋禮月以千緡悉歸之公帑除直祿閣兩淮轉運副使朝廷遣人檢沙田蘆場欲築增租額子瀟以承買異冒占力止之時議者言田之並太湖者被水患宜分道諸浦注之江詔子瀟往案視還言太湖當數州巨浸豈松江一川所能獨泄昔人於常熟北開浦二十四以達大江又開浦十於崑山東南以入海今皆湮塞宜加疏浚從之遂浚常熟東柵至雉浦入于涇谷又疏鑿福山塘至尚市橋北注大江分殺其勢水患用息明州守趙善繼治郡殘酷子瀟率諸監司劾罷之除直

敷文閣知臨安府吏不能欺禁權家傲人子女爲僕妾者詔權戶部侍郎郎華文閣待制復知臨安府調三衙卒修築都城不擾而辦金主亮淪盟于滿獻助軍錢十五萬緡特遷一秩帝幸建康充行宮留守參謀官扈蹕還復知臨安府金人來議和于滿謂事情叵測宜以軍禮待之孝宗嗣位志圖恢復于滿練兵習爲鵝鵠魚麗陣上觀於便殿嘉之賜金帶揮敷文閣直學士移知明州沿海制置使臺諫王十朋王大寶抗疏留之帝曰朕委以防海行名還矣初海寇以路過郡胥吏更反爲之用匿其蹤迹賊遂大熾商船不通于滿以禮延士豪俾率郡胥分道入海告之曰用命者有厚賞不則殺無貸胥衆震恐爭指賊處悉禽獲凡豪猾爲賊囊橐者窮治之海道遂平陞龍圖閣直學士知福州歲饑告糴旁郡米價頓平民賴以濟進龍圖閣學士移知泉州吏有掠民女爲妾者其妻妬悍殺而磔之貯以缶抵其兄與化掾安廉中妾父詣郡訴吏不決于滿訪知狀亟遣人往與化果得缶以歸獄遂決其發適槩類此乾道二年卒于官年六十六

趙士晤

按宋史本傳士晤字公美濮安懿王曾孫也天資警敏兒時儼如成人比弱冠爲右監門衛大將軍貴州團練使從上皇北遷次洛州東與諸宗室議欲遁還據城謀未就而金人圍合皆散走士晤乘驢西亡夜半盜斂驢去徒步疾趨遲明抵武安酒家語人曰我皇叔也邑官聞之來謁資以衣冠鞍馬因募得少壯百餘人從至磁州招集義兵以解洛圍旬日間得勝

兵五千人歸附者數萬時洛州守臣王麟欲叛降敵軍民怒殺之推統制韓一爲主士晤夜半薄城下力戰破圍翌日入城部分守禦敵治壕塹樹鹿角示以持久士晤礪將士死守飛火炮碎其攻具以計生得其首領敵乃解圍去以功遷權知洛州仍兼防禦使建炎二年金人再犯洛糧盡援絕衆不能守乃擁士晤出城由白家灘抵大名府詔赴行在紹興五年還泉州觀察使再遷平海軍承宣使知南外宗正事時泉邸新建向學者少士晤奏宗子善軫文藝卓絕衆所推譽乞免文解由是人知激勵還節度使未拜而卒年四十六贈少師追封和義郡王淳熙中諡忠靖子不流歷臨安紹興帥治有聲

趙士喟

按宋史本傳士喟字仲夫太宗五世孫初以廕補官累轉太子率府副率建炎初隆祐太后幸洪州敵奄至百司散走士喟至一大船中見二帝御容負以走遇潰兵數百同行至山中衆欲聚爲盜士喟出御容示之曰盜不過求食爲朝夕計耳孰若仰給州縣士喟以近屬諭之必從如此則今日不餓餓後日不失實是一舉而兩得也衆聽命乃走謁太后后度州會虔民作亂鄉兵在外爲慮與官軍相持士喟詣執政謂當請太后急肆赦人知死庶可安集又宜急諭城中城中定則外寇可弭譬如服藥心腹已安外禦風濕乃餘事耳救既下城中遂定遷右監門衛大將軍惠州防禦使紹興二十一年卒贈建寧軍承宣使追封建安郡王

趙士晴

按宋史本傳士晴太宗之後裔濮王之裔也從上皇俱北遷葉間變姓名入僧寺中落髮衣僧衣以行抵會稽恩賜循幸以單恩轉千牛衛將軍奉朝請而卒

趙不羣

按宋史本傳不羣字介然太宗六世孫宣和中量試授承事郎靖康初宰濟南章丘縣縣當山東海北之衝不羣募效用五千人增城浚濠爲戰守備敵攻圍兩月不能下遷維州通判陞直祕閣通判鎮江府辟充兩浙宣撫司主管機宜文字高宗在越詔改郴州時羣盜出沒湖湘間不羣嚴備禦盜不能犯進直顯謨閣移知鼎州充湖北兵馬副鈐轄既而朝廷慮郴失守復置不羣于郴會岳飛破曹成成遁因犯郴不羣乘城固守拒卻之進直黃文閣移知宣州軍需以時辦而民不擾進秩二階知廬州鄧瓊叛擁不羣北去尋釋之以歸帝召見問瓊叛故不羣曰由劉錡除制置瓊等以爲圖已衆撫諭後時故叛帝悔之除知荆南府累遷兩浙路轉運副使卒于官

趙不尤

按宋史本傳不尤有武力靖康之難與王明募義兵與金人戰雄張河南北盜皆避其鋒曰此小使軍也高宗即位引衆歸補武翼郎從岳飛平金寇飛死檜奪其兵遣守橫州而卒子善悉進士登第累官敷文閣直學士兩浙轉運副使

趙不忌

按宋史本傳不忌字仁仲嗣濮王宗暉曾孫也父士圖從上皇北遷遙拜集慶軍節度使不忌初補保義郎紹興二十七年登第易左宣義郎調泰州金華丞

治縣豪何汝翼械請於郡編隸他州邑人憎服除未州通判郡歲輸米倍收其贏民病之不忍言於守損其數帥司檄不意錄靖州獄辨出冤者數十百人靖人德之繪其像以祠除知開州開在巴東俗鄙陋不恩爲興學俾民知孝義郡有鹽井舊長吏必遺所親監之私其利不意罷遣鹽利倍入郡計用饒以羨餘代民輸夏秋兩稅及天申節銀絹在開二年民絕關爭夜戶不閉諸司交薦以比古循吏轉夔州轉運判官開人數千進城門不得行至夔民病上供銀時部使者以親故攝大寧鹽場專其利不恩斥去而鹽獲羨餘乃出錢市羨鹽數十萬斤易米得三萬餘斛運抵湖北市銀以歸代諸郡納上供銀省縑錢十五餘萬改成都路轉運判官適歲饑不恩行抵瀘南貸官錢五萬緡遣吏分糴比至下令曰米至矣富民爭發粟米價遂平雙流朱氏獨閉糴邑民羣聚發其廩不恩抵朱氏法籍其米黥盜米者民遂定永康軍歲治都江堰龍石蛇絕江退水以灌數郡田吏盜金減役夫堰不固而圯田失水故歲饑饑不恩躬視操板築繩吏以法乃出令民業耕者田主貸之事未作者富民振之老幼疾患者官爲粥視全活數百萬黎州青羌奴結兒反制司調兵往戍屬不恩給餉故事富人出糧而下戶以力致于邊不恩曰民饑不可擾也以糴餘米發卒運之已而朝廷命不恩攝制司初官兵敗前制使遣人賂奴結兒以和不恩曰奴結兒吐蕃小種也今且和若大族何不聽會豪夢東畜列率數千人入漢地二百餘里成都大恐不恩靜以鎮之召僚屬飲夜進步將領飛山軍徑赴沱江黎又徙綿州

兵戍邛州爲後援戒之曰堅守勿動密檄諸蕃部生獲吐蕃一人賞十緡殺一人二緡於是邛部川首領崖穰合諸部落大破吐蕃於漢源斬夢東畜列首來獻凡十有六日而平嘉州虛恨蠻人寇不恩標吐蕃百境上蠻懼一夕遁去不恩乃令緣邊家出丁夫一人分戍諸堡復其家不恩罷歸蜀人送者自成都至雙流進道不得行未幾除成都提刑改陝西路轉運判官廷臣薦其賢詔授右監門衛大將軍惠州防禦使知大宗正事非常制也吏白承受奏請須用中貴人不恩曰有司不存乎罷不用中貴人或請見輒謝出之進明州觀察使俄陞招慶軍承宣使金人完顏烈來聘充館伴副使使從者舊見館使皆對揖不恩不爲禮宴玉津園不恩連射皆中使者驚服不恩以文行訓勉族屬薦其秀傑者奏新學官增廣弟子員做大學校定法置自訟齋使有過者讀書其中人感勵淳熙十四年卒年六十七贈開府儀同三司封崇國公不恩性篤孝生七歲遭父北遷每思慕涕泣長力學母曹氏止之答曰君父讎未報非敢志富貴也登第時已入仕法當超兩秩請回授其母母封法止令人高宗嘉其志特封郡夫人居官所至有聲立朝好言天下事蜀中武帥操重權不恩請復置安撫司相維而治其論王抃不宜揀選諸路軍王友直不可爲副都指揮使九人所難言者遇大旱一日九疏勸上求直言通下情退而燬其藁時布衣上書狂悖多抵罪不恩謂太上皇帝不罪言者此宜書之御座右帝悚然可之既嘉其忠諫每宴禁中帝飲之酒顧謂皇太子曰此賢宗室也一日坐待漏院有給事

中曰英國公借擊越馬不恩正色曰上惟一皇孫萬一馬驚墮斬汝輩無益也馬竟不可得所敬者朱熹張杖杖死爲請諡又請用熹其好尚如此

趙善俊

按宋史本傳善俊字俊臣太宗七世孫父不衰閬路兵馬鈴轄善俊初補承節郎紹興二十七年登第換左承務郎調南城丞改昭信軍簽判奇之虞允文亦薦其有邊帥才除幹辦諸司審計司知郴州數奏稱旨留爲太府寺丞尋攝帥知廬州會歲旱江浙饑民廩至善俊括境內官田均給之貸牛種僦屋以居死者爲給棺人至如歸州城舊毀於兵善俊葺完之因言異時恃焦湖以通饋餉今既堙涸宜募鄉兵保孤姥二山治屋以儲粟敵或敗盟則吾城守有餘餉道無之矣又增築學舍新包拯祠春秋祀之人感其化累遷龍圖閣直學士移知建州建俗生子往往不舉善俊痛繩之給金穀捐已俸以助其費再知廬州首言和好不可恃當高城浚池以爲備復均陂七門堰農政用修免責屬邑坊場河渡羨錢百姓德之以父憂去服闋起知鄂州適南市火善俊亟往視事弛竹木稅發粟振民開古溝創火巷以絕後患僚屬畢言用度將不足善俊曰吾將瘠己肥人乃省燕游車騎鼓吹之費郡計用饒代輸民役錢再知建州歲饑民羣趨富家發其廩監司議調兵掩捕善俊曰是趣亂也諭許自新平米價民乃定邑尉入盜十三人死罪以希賞善俊辨其冤徙知隆興府移江西轉運副使時朝廷議減月椿錢善俊言及州不及縣則縣仍迫乞於民猶不減也宜一路通裁其額下之漕臣科郡

縣輕重均減之又奏和買已是白科從而折變益加糜費其數反重於正絹併乞蠲減諒卒遇赦還者刺充鋪兵可除民害所言多見用轉湖南帥柳桂地絕遠守多非才善俊謂宜精其選代輸潭州經總制錢停醴陵淶水渡錢加祕閣修撰移知鎮江府丁母憂終喪而卒年六十四善俊風儀秀整喜功名尤好論事孝宗時日中有黑子地震震每以飭邊備為戒孝宗英武獨運缺相者累年善俊極言相位不可無人尤人所難言者

趙叔近

按宋史本傳叔近悼王元孫榮良公克類之子也建炎元年為秀州守杭卒陳通反詔辛道宗將西兵討之兵潰為亂抵秀州城下叔近乘城諭以禍福亂兵乃去未幾差權兩浙提刑叔近招通通聽命叔近以素降數十人入賊城衆猶不解甲叔近置酒推誠待之遂皆感服城中稍定叔近奏通初無叛心止緣葉夢得賞不時給遂至紛爭今已就招請赦其徒二百餘人帝許之臺諫皆言不可遂廢叔近還秀州已而王淵兵至杭詐傳呼云趙秀州來通郊迎淵遂誅之初淵在汴京押娼周氏周氏後歸叔近淵街之乃誣叔近通賊奪職拘于州以朱芾代之芾肆殘虐軍民怨憤小卒徐明率衆囚芾迎叔近領都事叔近不得辭因撫定之請擇守于朝奏未達朝廷命張俊致討俊淵部曲也辭行淵謂之曰叔近在彼俊論意領兵至郡叔近出迎俊叱令置對方操筆刀遽前斷其右臂叔近呼曰我宗室也俊曰汝既從賊何云宗室語未竟已折首于地徐明等見叔近死遂反戈戛城

縱火驅掠翌日俊斬關入捕明等誅之取周氏歸于淵紹興九年御史言叔近之冤贈集英殿修撰

趙叔向

按宋史本傳叔向魏王之系也方汴京破時叔向潛出之京西金人退引衆屯青城入至都堂叱王時雍等速歸政置救駕義兵其後為部將于渙上變告叔向謀為亂詔劉光世誅之

趙善譽

按宋史本傳善譽字靜之父不倚太宗之後也善譽幼敏慧力學乾道五年試禮部第一初調昌國簿攝邑事勸編戶哀金買田以助嫁娶喪葬捕得海盜全黨守欲上其功善譽曰奈何以人命希賞守益賢之薦於朝授兩浙運幹改知撫州臨川縣縣嘗預借民賦善譽閱籍發逋負按籍征催卒以時辦集遂罷預借改常州添差通判史浩言其賢詔赴部堂審察累遷大理丞湖北常平茶鹽提舉會大旱善譽通融諸郡常平計戶振貸嗣歲麥未倍收民爭負以償奏罷稅場十餘渡四十五民便之俾諸郡舊田委郡文學董其入以給計偕者移潼川路提刑轉運判官遂寧守徐詡之廉聲部使者以其故御史寬假之善譽過遂寧詡出迎善譽抑使循廊詡大沮郡人聞之爭訟其過善譽劾諸朝宰相王淮善詡寢其章善譽徑以聞罷詡又以美貲給諸郡置莊民生子及振者俱給米威惠並孚宗子寓蜀者少業儒善譽即郡庠立學以教之人始感勵引年乞祠歸處一室以圖書自娛無疾而卒年四十七時淳熙十六年也善譽早失怙恃撫育諸季備至居官廉靖自將多所著述郭雍朱熹嘗取其易說云

趙希言

按宋史本傳希言字若訥惠王令應元孫也淳熙十四年第登調衛州司戶合郡民以計表其坊里操其戶數為圖獻于守守才之西安令不職守檄希言攝邑漕善令會嚴州請復烏龍鎮稅場檄希言往訪之俾令得復職希言力陳烏龍場不當復漕怒曰衛已復孔步章戴二場何烏龍獨不可復希言謂二場當併罷去漕不能奪二場竟亦廢改吉州司理屬邑有誣人以殺人罪者吏治之急囚誣服希言鞠得實檄縣他捕乃得真盜用楊萬里周必大薦授臨安府司法改淮西總所幹辦移書約諸郡綱必時發至即受納無滯留始至軍庫見錢不滿千緡此去庫錢充溢知臨安仁和縣闢學宮四百餘畝適大旱蝗集御前蘆場中互數里希言欲去蘆以除害中使沮其策希言驅卒燔之臨平塘隄決希言督役親捧土投石兵民爭奮隄成因築重隄後不復決民病和買絹折錢重希言節公費代其輸除大社令遷樞密院編修官兼右司上言諸將但務城守敵來不拒去不復追異時之憂殆不止保江而已宜諭諸將一軍受圍諸軍共守敵不渡淮則均受賞以戰為守毋以守為守選宗正丞請南班得與輪對許之累遷祕書丞著作郎軍器少監皆兼右司又充密院檢詳為宰屬樞掾凡六年奉祠去嘉定十七年卒年六十一贈資政殿大學士封越國公諡忠憲子與權登進士第再中刑法科官至開府儀同三司

趙希憚

按宋史本傳希惲字伯和燕王八世孫登淳熙十四年進士第趙汝愚帥福建希惲爲屬吏嘗言治人如修身治政如理家愛民如處昆弟取古今官著惠愛者緝爲一編曰是吾師矣汝愚嘉之薦于憲辛棄疾棄疾尚氣僚吏不敢與可否希惲獨盡言無所避屬邑候官苦稅重每不登額希惲稽核公帑羨錢以足之棄疾亦薦其能汝愚當國調江東運司幹辦同寅有坐侂冑黨者諸司莫敢薦希惲賢其人請以薦己者薦之改太平州通判先是盜踪而逃者捕得處死希惲言強盜特貸命而輒逃者斬今黥罪致死非法之平也自是皆減死論遷江西茶鹽提舉歲饑惡少聚劫希惲將自臨按幕屬力止之不聽曰希惲不出饑民終不得食且召亂矣遂行發粟賑給禽首謀者治之其黨遂散陞本路帥兼漕事黑風峒羅世傳寇郴陽奸民潛通賊陰濟以糧希惲捕治之賊乏食乃去未幾李元礪寇郴陳廷佐寇南安復誘羅世傳與合劫掠至龍泉有何光世者能知賊動息希惲授光世計俾誘世傳誅元礪以自贖功未竟移知平江府其後世傳果縛元礪以獻廷佐勢孤亦降移知太平州希惲爲倅日習知其民利病遂損折市價減權酷額以蘇民力已而乞祠遷端明殿學士換昭信軍節度使開府儀同三司致仕嘉定五年卒年五十八贈少保封成國公

欽定古今圖書集成明倫彙編官常典

第二百九十三卷目錄

宗人府部名臣列傳四

宋二

趙彥樞

趙彥逾

趙汝談

趙希範

趙必愿

趙汝騰

趙彥俠

趙崇憲

趙汝述

趙汝讜

趙與權

官常典第二百九十三卷

宗人府部名臣列傳四

宋二

趙彥樞

按宋史本傳彥樞字文長博王七世孫祖訓之在忠義傳彥樞登乾道二年進士第尉樂清會大旱令循故事禱雨而責租益急彥樞曰損斂已責所以招和氣何禱爲已而果雨累官福建路運幹屬邑負振鹽本錢數千萬累歲不能償彥樞白其長鑄之慶元初



知晉陵縣歲飢彥樞振恤有方所活幾二十萬又以羨錢爲五等戶代輸糧監登聞檢院時韓侂胄方柄用朝士悉趨其門彥樞切歎惋出知汀州州民葉姓者嘯聚汀贛間彥樞遣將捕戮之遷廣西提刑諸郡驚官監取息之六以奉漕司後增至八分彥樞復其舊以蘇民力朝廷從之侂胄死詔戶部侍郎兼樞密院檢詳士大夫前與兵議者坐侂胄黨將併逐之彥樞歎曰士方以爲學廢今又以兵端斥去苟欲錮士何思無名每見帝必言才難遷湖廣總領舊士卒物故大將不落其籍而私其月請彥樞置別籍稽核之或傳軍中有怨言彥樞曰不樂者主帥耳何損士卒持之三年掛虛籍者贏三萬額減錢百萬緡用度以饒比去餘七百萬而諸路累積逋負猶四百萬盡蠲之知平江府郡之昆山並大海盜出沒莫可蹤跡彥樞奏分其半置嘉定縣屯兵以守轉實謨閣待制卒於官年七十一

趙彥俠

按宋史本傳彥俠字安卿彭城侯叔聚曾孫也父公廣饒州太守彥俠初調深陽尉邑民潘氏兄弟橫邑中號三虎畜僮僕數百邑官莫敢誰何彥俠白其守治之縛潘氏昆弟正其罪改揚州司戶攝獄掾有告主藏吏盜錢餘千萬治之急吏泣請死彥俠察其情屏人問則諸吏共貸也乃許自首免罪一日而畢改平江府推官攝宜興縣縣自中興後預借民明年稅民挾此得慢其令彥俠請禁預借邑遂易治知臨安於潛縣縣胥往往通臺省吏得肆其奸彥俠執其點者械送府臺省吏從中救之彥俠力爭竟抵胥罪浮

橋屢以水敗彥俠梁以石民免溺死臨安府通判開禧初知興國軍歲旱蝗而軍需益急屬邑令吳格負上供銀尤多彥俠坐累貶秩格愧謝彥俠曰屬時多艱宜寬民力以崇根本何謝爲潰卒據外城爲變彥俠募能斬捕者賞之既而各斬首以獻散其餘黨累遷湖南運判徭人羅孟傳反累歲不能平彥俠謂帥臣曰徭人讎殺乃其常情况主斷不平是激之使叛也能遣謀者離其黨與俾還自相讎破之易矣帥從其計遂降孟傳尋知紹興府檜輕彥俠權以法民便之復鹿鳴禮置與賢莊以資其費築捍海石塘亦置莊以備增築會旱饑民聚陂湖中彥俠取死四縣首別足徇於衆曰此劫菱藕者也遂散其衆乃第民高下損其稅有差免輸湖籍田米舉緡錢四十萬以助荒政民賴以濟詔改太府少卿遷顯謨閣知太平州調江西轉運使嘉定十一年卒於官年六十四

趙彥逾

按宋史本傳彥逾字德先魏悼王後崇簡國公叔萬曾孫也紹興三十年登第淳熙五年知秀州累遷太府少卿四川總領將入境利西帥吳玠遣屬吏安丙來迓彥逾見即喜其人從容問之曰太尉統衆六萬得無虛籍乎丙以情告彥逾遣提書俾損虛籍數千以寬四川之賦挺不敢隱改知鎮江府郡適旱飢彥逾節浮費發粟賑羅民賴以濟遷戶部侍郎工部尚書孝宗崩光宗疾不能持喪樞密趙汝愚議請立嘉王爲皇帝欲倚殿帥郭某爲用遣中郎將范任告之杲不應時中外洶洶彥逾見汝愚對泣汝愚密告以翊戴之議彥逾大喜力贊其決郭某被誣彥逾爲

白於帝吳德之遂馳告吳曰彥逾與樞密第能謀之耳太尉爲國虎臣當任其責吳未及對彥逾急責之吳許諾遂領兵爲衛寧宗即位汝愚謂彥逾曰我輩宗臣不當言功會置正死相汝愚登右揆彥逾以端明殿學士出知建康兼江東安撫使未行改四川安撫制置使兼知成都府彥逾爲政不擾蜀人便安之以定策勳累遷資政殿大學士嘉泰間知明州兼沿海制置使嘉定間乞祠以歸尋卒彥逾始與汝愚協濟大計冀汝愚引己共政及外除頗缺望乃疏當時各臣上之目爲汝愚黨帝曰是疑汝愚其兩入蜀皆有聲然吳氏世守武興兼利西安撫操重權吳挺卒朝廷用丘宙議併利西安撫於東路以革世將之弊而彥逾奏復利西安撫乃傾以武帥其後吳曦因之以生變人以是咎彥逾云

趙崇憲

按宋史趙汝愚傳汝愚長子崇憲字履常淳熙八年以取應對策第一時汝愚侍立殿上降再拜以謝孝宗顧近臣曰汝愚年幾何已有子如此越三年復以進士對策擢甲科上謂執政曰此汝愚子豈即前科取應第一人者耶崇憲初任爲保義郎監饒州贍軍酒庫換從事郎撫州軍事推官汝愚帥蜀辟書寫機宜文字改江西轉運司幹辦公事監西京中岳廟汝愚既死海內憤鬱崇憲聞門自處居數年復汝愚故官職多勸以仕改奉議郎知南昌縣事奉行荒政所活甚衆升籍田令制曰爾先人有功王室中更議毀思其功而錄其子國之典也崇憲拜命感泣陳疏力辭以爲先臣之冤未悉昭白而其孤先被寵光非

公朝所以勸忠孝厲廉恥之意俄改監行在都進奏院復引陳瓘論司馬光呂公著復官事申言之乞以所陳下三省集議若先臣心迹有一如言者所論即近日恩典皆爲冒濫先臣復官賜諡與臣新命俱合追寢如公論果謂誣讒乞昭示中外使先臣之謫謗既辨忠節自明而憲聖慈烈皇后擁佑之功德益顯然後申飭史館改正誣史垂萬世之公又請正趙師召妄貢封章之罪究蔡璉與大臣爲仇之姦毀璉願正續稽古錄之妄詔兩省史官考訂以聞已而吏部尚書兼修國史樓鑰等請施行如章從之及誣史未正復進言其略謂前日史官徒以權臣風旨刊舊史焚元藁略無留難今詔旨再三莫有慨然奮直筆者何小人敢於爲惡而謂之君子者顧不能勇於爲善耶聞者愧之其後王惲日曆所卒以重修龍飛事實進呈因崇憲請也未幾贈汝愚太師封沂國公擢崇憲軍器監丞改太府監丞遷祕書郎辭弗許尋爲著作佐郎兼權考功郎官嘗因雨求言乃上封事謂今日有更化之名無更化之實人才國之元氣而忠鯁擯廢之士死者未盡省錄存者未悉褒揚言論國之風采其間輸忠亡隱有所規益者豈惟獎激弗加蓋亦罕見施用瑜安取容無所建明者豈惟黜罰弗及或乃遂階通顯至若勉聖學以廣聰明教儲貳以固根本戒宰輔大臣同寅盡瘁以濟艱難責待從臺諫思職盡規以宣壘蔽防左右近習竊弄之漸察姦儉餘黨窺伺之萌皆懇懇爲上言之請外知江州郡民歲苦和糴崇憲疏於朝末獨之且轉糴旁郡穀別庫儲之以備歲儉瑞昌民負茶引錢新舊累積爲十

七萬有奇皆困不能償死則以責其子孫猶弗貸會新券行視舊價幾倍徙崇憲歎曰負茶之民愈困矣亟請以新券一償舊券二詔從之受賜者千餘家刻石以紀其事修陂塘以廣溉灌凡數千所提舉江西常平兼權隆興府及帥漕司事遷轉運判官仍兼帥事初汝愚捐私錢百餘萬創養濟院俾四方賓旅之疾病者得藥與食歲久浸移爲它用崇憲至尋修復立規約數十條以愈疾之多募爲賞罰棄兒於道者亦收鞠之社倉久敝訪其利害而更張之以兵部郎中召尋改司封皆固辭遂直祕閣知靜江府廣西經略安撫靜江之屬邑十地肥磽略等而陽朔脩仁荔浦之賦獨倍焉自張枋奏減之餘人猶以爲病崇憲請再加蠲減詔遞損有差三縣民立祠刻石瓊守非才激黎峒之變乃劫去之改辟能者代其任羅蔓峒者仍歲寇鈔爲暴實民何嚮父子陰誘導之崇憲捐金贖付小校使繫以來寘之法因嚴民彝交通之禁使邊民相什伍寇至則鳴鼓召衆先後掩擊俘獲者實不至者有懲先是部內郡邑有警輒移統府兵戌之在宜州者百人古縣半之崇憲謂根本單虛非所以窒姦萌迺於其地各置兵如戌兵之數而斂戌者以歸邕爲邊要害地自秋青平儂智高所以設扞防者甚至歲久寢弛而溪峒日彊崇憲條上其議朝廷頗采其言然未及盡用也崇憲天性篤孝居父喪月餘始食食小祥始如果實終喪不飲酒食肉比御猶弗入者久之

趙汝談

按宋史本傳汝談字履常生而穎悟年十五以大父

恩補將仕郎登淳熙十一年進士第丞相周必大得其文異之語參知政事施師點曰是子他日有大名於世調汀州教授改廣德軍添差江西安撫司幹辦公事嘗從朱熹訂疑議十數條熹嗟異之佐丞相趙汝愚定大策汝愚欲驟以詞掖處之力辭去持祖母服汝愚去國其弟汝諱力上疏乞雷汝愚斬佞胃聞者吐舌兄弟羅黨禍斥去尋調安慶府教授添差浙東安撫司幹辦公事丁母憂免喪召爲大社令時佞胃用事熾甚汝談痛憤登壇讀祝大呼佞胃及陳自強名自強不能堪他日指汝談曰未坐白哲者何人汝談不爲動以參知政事李璧薦名試館職擢正字是時吳曦叛上下束手或請就以曦爲王其人造汝談汝談詰之曰孰欲王曦者可斬其人面發赤不能對遂以言去主管崇道觀添差通判嘉興府與郡守王介志合改知無爲軍與光州守柴中行安豐守陸峻俱稱循吏時金人內變有旨令獻料敵備邊二策其料敵之策曰禍亂猶在河北未遽至河南蓋英雄擇形勢大盜窺貨寶金帛重器俱聚河北河南無大川爲之險欲起安所憑且金素以河南近我置守多完顏氏親黨其下亦令蕃漢錯居所以防慮備盡縱彼喪亂守將欲叛則自叛何至相率盡反然有天下者自不容易一日廢備豈以金人存亡之候爲吾緩急哉其備邊之策曰今邊州大抵無城缺兵少糧鎧仗不足若使自辦何所取資勾諸朝廷安得力給若做古藩封拔用英傑守郡則併租稅市權之利盡與之免其共貢上不置監臨下悉聽選辟民得自賦兵得自募凡百悉聽所爲其有功者亦不遽徙就峻爵

秩增異車服給美田宅官其子孫凡可優寵無不極至使內爲公卿雖貴曾不如守邊之樂如此則有才者爭自奮勵緩急必能出力報上於後河南二十餘年猶爲金守宋沿邊諸郡權大削兵事無肯任責者汝談之言若著龜然改湖北提舉常平振饒盡力知温州改知外宗正作詩勉其族屬皆望風而化還江西提舉常平寧宗崩以哀痛得疾賀理宗表力寓勸戒陳碩曰此諫書也數句祠授江西轉運判官辭不復命之官一月以言者罷先是汝談因疾去官言者謂其傲視軒冕不樂爲世用至是彌遠不與祠迺杜門著述端平初以禮部郎官召入對言倚用老成廣集忠智訪求衆敵之原辟取可行之策以飭積蠹之蠱而成終奉之功者願加聖心焉又言大佞似忠大姦似聖未免信向而擢任之始未見甚失久乃浸至差訛則綱維之臣將不能不執議論之士將不得不言執之堅寧不疑其侵權言之數寧不意其賣直至是則不特是非邪正易位而黜陟予奪失中多矣又曰外之得以窒吾聽雖吾目擾吾天君者以吾未得虛一而靜之理也苟得之導我聲色而不能入投我寶貨而不能中扇我以功名而不能動疑然湛然孰得干之哉改祕書少監兼權直學士院時集議出師汝談反覆言不可輕戰而和尤非計既而三京收復雖前言用兵不便者亦喜汝談獨有憂色未幾洛師敗朝論始服其先見遷宗正少卿兼權直兼編修國史檢討實錄兼崇政殿說書因講論語而言漢元帝恭儉無過惟以剛不克改明不能繹優柔不斷而漢業遂衰權吏部侍郎升侍讀兼直學士院兼同修

國史院同修撰以所註易進講時朝議屢祇稱精汝談言非便迂時宰意京師軍變宰相乞貶秩上已允汝談奏恐失體持不可草答詔以爲貶秩易審舉措難宰相滋不悅以言去國提舉崇禧觀起知婺州四辭不允至郡力勾祠名赴行在四辭權禮部侍郎兼學士院力辭兼直時金兵新破三關增秩稱提督樞四部獲賞汝談獨蹙額登對首疏言邊面無可倚仗乞超越拘攣簡拔俊傑如吳用周瑜魯肅管任祖遜陶侃故事使之各分方面連數十城推轂授機盡歸賜履巴蜀一人荆襄一人兩淮各一人一切便宜行事不復更從中御庶幾伸縮由己機用出心蓋推廣鄉者備邊之策且曰臣之此策行於開禧未用兵之前決不至罹今日之患其論格法尤中時弊上稱嘆久之且謂卿文學高世宜代予言力辭何爲卒以老新免章四上免兼直改侍講數日仍兼直學士院五辭權給事中權刑部尚書及卒轉兩官遺表上又轉四官汝談天資絕人沈思高識自少至老無一日去書冊其論易以爲爲占者作書堯舜二典宜合爲一禹功只施於河洛洪範非箕子之作詩不以小序爲信禮記雖出諸生之手周禮宜傳會女主之書要亦卓絕特立之見爲文章有天巧篤於倫誼而忘仇怨御史王益祥嘗劾之復汝談官其鄉益祥愧不敢見汝談乃數過之相得歡甚嘗論議韓非李斯皆有苟卿之才惟其富貴利欲之心重故世得而賤之惟卿獨能守其身不苟希合士何可不自重哉所著有易書詩論語孟子周禮禮記荀子莊子通鑑杜詩注

趙汝述

按宋史本傳汝述字明可太宗八世孫曾祖士說從二帝北遷臨河馬敵而死汝述登淳熙十一年進士第調南劍州順昌尉嘉定六年詔主管官告院自是常兼宰士累遷將作少監權待立修注官八年除起居郎兼密院都承旨俄遷兵部侍郎以母憂去服闋改刑部侍郎遷尚書知平江府卒汝述爲尉應詔上封事論議懇惻立朝薦引多知名之士然爲時相所親躡躡通顯人亦以此少之

趙希館

按宋史本傳希館字君錫舊名希謁登慶元二年進士第改賜今名少扶父喪歸道遇寇左右駭散希館拊棺慟哭不憚寇義而去學於陳傳良徐誼既舉進士調汀州司戶峒寇李元礪方起汀人震懼郡會僚佐議守城希館下坐無一語守異之曰不言得無有所見乎希館曰守城非策也距城三十里有關曰古城若悉精銳以扼其衝賊不足慮矣守以付希館人爲危之希館至關審形明問中令謹候分畫粗定賊已遣謀窺關希館得謀詰之縱其舉火相示而羸師以誤之夜半賊數百銜枚突至希館嚴兵以待賊且至始命矢石俱下賊無一免餘黨聞風而遁希館引還老稚羅拜相屬希館由他道以避之事聞詔升州推官治疑獄決滯訟攝下邑弭亂卒去之日軍民遮道泣送者數十里調主管夔州路轉運司帳司疏大寧鹽井利病使者上諸朝民便之改知玉山縣未行召對希館首言民力困於貪吏軍力困於債帥國家之力則外困於歸附之卒內困於浮沉之費次論四蜀銓科舉之弊次論大寧鹽井本末寧宗嘉納之授

大理寺丞遷大宗正丞權工部郎官宗姓多貧而始生有訓名爲人後有過禮更受賕亡藝莫敢自陳希館白其長推行之會朝議燕邸近屬赴朝參者少命希館易班希館力辭弗克特授授吉州刺史提舉佑神觀未幾廷臣言宗姓換班人嘗舉進士請視朝士聽輪對於是希館次對時首論今日多事之際而未有辦事之人朝紳清選也以絀職爲清重以刻薄爲舉職以無所可否爲識體圖奇重任也以大言爲有志以使過爲知恩臣非敢厚誣天下以爲無人患在選擇未得其道器使未當其才爾授成州團練使賜金帶令服繫以寶璽推恩進和州防禦使理宗即位進潭州觀察使以公族近邸恩特加厚又進安德軍承宣使希館引對言初政急務莫先於明道總治統收人心上爲動容越明年論祠祭不獨禁衛不肅慈明宮上壽升節度封信安郡公卒遺奏聞上震悼輟視朝賜舍斂贈以金帛希館風姿凝重臂抱魁壘揚人之善不記人之過急人之難不忘人之恩居官祁寒盛暑未嘗調告衣食取裁足而已追封信安郡王

趙汝讜

按宋史本傳汝讜字蹈中少儻有軼材智略出人上龍泉葉適嘗過其家汝讜年少衣短後衣不得避適勸之曰名門子安可不學汝讜慚自是終身不衣短後衣折節讀書與兄汝談齊名天下稱爲二趙以祖遺恩補承務郎歷泉州府舶務利州大軍倉屬從臣薦宗室之賢者監行在右藏西庫韓侂胄謀逐趙汝愚汝讜兄弟昌言非是且上言訟汝愚冤侂胄懼其詞直使其黨胡紘再攻汝愚以汝讜兄弟受汝愚

厚恩私屬爲之畫策惑亂天聽爲言斥使去國坐廢十年調華亭浦東鹽場棄職去辟浙西安撫司幕官調養書昭慶軍節度判官皆不赴以前官改鎮東軍登嘉定元年進士第爲大社令遷將作監簿大理司農丞與史彌遠不合請外改湖南提舉常平易江西尋提點刑獄瑞州大姓幸氏貪徐氏田不可得強取其禾終不與誣以殺婢實徐獄徐訴其冤汝讜以反坐法黥竄幸氏籍其家幸氏走告急於中官徙汝讜湖南既至則表直臣龔夬墓瀏陽有豪民羅氏奪民田汝讜復懲以法還知溫州卒汝讜常言宗子不忘君孝子不辱身臨難則功業當如朱虛立身當如子政

趙必愿

按宋史本傳必愿字立夫廣西經略安撫崇憲之子也未弱冠丁大母憂哀毀骨立服闋以大父汝愚遺表補承務郎開禧元年銓監平江府糧料院調常熟丞嘉定七年舉進士知崇安縣判判如流吏不能困修學政立催科法列戶名爲三等以三期爲約足者旌之未足者寬以趣之踰期不納者里胥督之民皆感懌願輸草胥吏鬻鹽之敝擅發光化社倉活饑民帥怒逮吏欲懲之必愿曰芻牧職也吏何罪束擔俟譴帥無以詰而止舊有均惠倉無所儲必愿捐緡錢增糴至二千石力主義役之法鄉選善士任以推排入資買田助役則勉有產之家有感化者出己田以倡遂遍行一邑上下便之臺府以聞下其式八郡四十八縣秩滿民共立祠刻石授湖廣總所幹辦公事丁父憂居喪盡禮遣書問學於黃幹服除差充兩

浙運司主管文字再考特差充提頓安邊所主管文字差知全州陸辭奏乞下道江二州訪周倬隨之後知常州改知處州陳折帛納銀之害皆得請移泉州罷白土課及免差吏權鐵諷諸邑行義役秋旱力講行荒政乞撥永儲廣儲二倉米振救差主管官告院越五日詔依舊主管官告院兼台州一循大父之政察民疾苦撫摩凋瘵修養濟院建陳確祠政教兼舉端平元年以直祕閣知婺州至郡免催緡定六年分小戶綾羅錢三萬緡有奇立淳良頑慢二籍勸懲人戶措置廣惠倉及諸倉積穀奏乞寬減內帑綾羅申省免用舊例預解諸色窠名錢罷開化稅場還太府寺丞尋遷度支郎中詔以汝恩配享寧宗從必恩請也兼右司郎中引見疏言陛下英明密運斷出於獨固欲一切轉移之然而大權若在我或者猶有下移之疑衆正若已開或者猶有旁徑之疑策免二相銷天變也去者固難以復留留者恐終於引去虛鼎席以待故老疑者或意其未必來而況在數千里之外貴次補以任大政疑者或意其不敢專而況於不安其位中書政之本也今果何時尚可含糊意向以啓天下之疑乎親擢臺諫開言路也用之未久者何爲輕於易去去之未幾何爲使之復來召於外服者不知果能用之而必堅除目周行者不知果能聽之而無諱乎朝廷除授軍國賞罰本至公也今有姓名未達於廟堂而遷擢忽由於中出斥逐三衙竟不指名罪狀而人始得以疑陛下矣一除目之頒一號令之出雖未必由於閣宦而人或疑於閣宦雖未必由於私謁而人或疑於私謁雖未必由於戚畹宗邸而

人或疑於戚畹宗邸夫天下者祖宗之天下也非陛下所私有也陛下雖有去弊之心而動涉可疑之迹陛下亦何樂於此時論偉之三京兵敗邊事甚亟詔條上守禦計必愿言十事下哀痛之詔合江淮之兵揀江陵之急節財用之宜靡議和之使撫無歸之民處北來之衆置鎮撫之使擇帥閫之代拔未用之將皆切於邊要政府議緒幣日輕欲令諸州再用印及他爲稱提之法必愿力爭不可嘉熙元年貽書政府論邊防事宜授右司郎中火災必愿應詔上封事曰開邊稔禍之刑牽制而未行激變棄城之戮姑息而未舉京襄淪沒祖宗之基業莫能保准蜀蹂躪赤子之冤魂無所依履蔽之令下而加以抑配稱提之法嚴而重以告訐民無蓋藏每有轉壑之憂士不宿飽常有思亂之志又曰臺諫給舍骨鯁之論莫容左右便嬖浸潤之言易入春夏常享閑略於原廟之尊節鉞隆恩殷勤於邸第之貴又曰必也正故相專國之罪嚴食夫徇國之誅思室鬼高明之瞰先編氓後親貴去木妖競治之費尚堅故革奢華戒宴殿無度之譏酣節內庭不急之營繕又論濟王及國本事遷左司郎中又遷司農少卿兼左司轉對言正氣日消月沮馴至今日非惟精神不肯論事下至草茅之士皆結舌矣端平初年沉痾方去新病未作陛下猶動於咨訪如恐不及今疾攻心腹決裂將潰乃不求瞑眩之劑以起其殆甚可惑也又曰母使人臣以指斥懷疑母致陛下以厭言得諍時直士相繼去故必愿及之兼勅令所刪修官拜司農卿兼職如故翼日改宗正少卿仍兼刪修勅令兼國史編修實錄檢討尋兼

左司遷太府卿仍兼編修檢討遷宗正少卿詔依舊太府卿仍兼職且兼中書門下檢正諸房公事轉對言中才庸主惟其無所知覺故其言不可入而敗亡隨之陛下作敬天之圖朝夕對越謂宜天意可回而熒惑失度鬱攸煽災迫近禁門幾殿左藏烟埃方息白晝隕星貫日之虹務陽之電覺見層出陛下觀時察變何由致此今日之事動無良策惟在側身修行祈天永命而已遷起居舍人兼職仍舊大水上封事曰海潮毀隘浸迫禁城災異之來理不虛發必上畏天戒下修人事易召名和轉移於陛下方寸間耳又曰周官國有大事則舉大詢之理今日之事迫矣謂宜合衆謀屈羣策上而措紳下而芻蕘各陳所見擇其可用之策以授任事之臣庶幾千慮一得以成天下人不因之意暫兼權右郎官言財非天雨鬼輸豈可輕施妄用長此不已必至顛覆異時或得罪今之大夫不能爲國生財程昇甫鐔之徒乘間提出推敲剝削以術相勝鑿空取辦以計巧取事倍斂歛羨餘間架縉錢之令下而唐祚愈促矣願陛下精思熟慮約己愛民必如勾踐之臥薪嘗膽必如衛文公之帛衣布冠可也權吏部右侍郎乞免兼檢正從之兼國史修撰時邊事急必愿應詔言宜勅彭大雅自重慶領王青之兵東下以復夔資李安民及歸峽二守以自效調一將督中流之師以伐其順流之謀調一將自問道出鼎澧之後以折其擣虛之鋒調一將助萬與之勢以備江陵之急又宜下湖南遣飛軍及團結民兵之類守沅江益陽江以防衝突長沙盡收江上民船無資敵用區畫皆中事機暫兼權侍左侍郎